



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

BJP MLA Rupjyoti Kurmi
anema FIR benok

Deepika Kumari-i mezüng round
nung Bhu Karma den asayatsü



VOL. XVIII NO. 280 (ADOK 280) DIMAPUR

KÜPTOKNÜ (SATURDAY)

CHITENI (JULY) 24, 2021

₹ 5.00

DoSE-i COVID-19 Vaccination Status meshir

Dimapur, July 23, 2021 (TYO): Directorate of School Education (DoSE)-i Nagaland nung sorkar aser nija school tekolakpurtem dang COVID-19 Vaccination Status meshiogo.

Nagaland nung KVs, JNVs aser SAINIK Schools dak alaka tanünga school ajaki July 27, 2021 nungi Online School Monitoring Portal <https://school.dosenl.in/> nung Teaching aser Non-Teaching staff indang COVID-19 Vaccination Status agütsüsüla, ta DoSE-i ashi.

CBSE Curriculum sülen anidakba school tem dena nija school ajak aser EKLAVYA Model Residential School temi agüja aliba link nung one time registration asütsü aser July 27 nungi Vaccination Status osang agütsüsü. Sorkar school temi School Monitoring Portal nung

Daily Activity Reports agütsüba indang link nung osang agütsüsü, ta DoSE-isa metetdaksü.

Online School Monitoring Supervisor temi iba maparen reprangtsü aser pei telongtet nung aliba sorkar school ajaki mapang shitak nung osang agütsüdaksüsüla, ta parnokisa ashi.

Yimtsüngtem mesüra meta talang pilar alidak network timtem ajurura, Online School Monitoring Supervisor temi School tekolakpurtem dang nungi osang bendentsü aser portal nung upload asütsü, ta DoSE-isa metetdaksü.

Iba osang ya Ministry of Education dangi hopta shia yoktsü anungji nisung ajaki Mongulbar/Bodbar shia osang agütsüsü tetuyuba agütsür, ta DoSE-isa ashi.

Nisungtemi COVID-19 wara tanabuba zübazüba bilemer

Kohima, July 23, 2021 (TYO): Nagaland nung aser talisa Kohima nung alirtemi coronavirus wara tanabuba kanga zübazüba bilemba agi nisung aika dak menatepa ao, ta PWD (Housing) Minister, Tongpang Ozukum-i ashi.

DTF Kohima-i COVID-19 testing & vaccination sensitization sentong ka ayonga agidak jembidang Kohima District Task Force (DTF) on COVID-19 atema Minister in-charge Tongpang-i iba osang metetdaksü.

Chief Minister Neiphiu Rio-i tuyuba ama DTF Kohima-i Kohima district ajungalen COVID-19 testing & vaccination sentongten agia aruogo, ta pai ashi.

"Nisungtemi COVID-19 wara mezüngbuba adokdang süoki ia bilem aser iba jagi virus menatepba azüoktet, saka wara tanabuba nungbo nisungtemi zübazübaa bilemba ajanga kanga prokshi" ta Minister Tongpang-isa ashi.

Wara mezüngbuba dang nungibo tanabuba ya tuluba lir anungji nübertem zübazülema melii tendangtsüla aser ano COVID-19 vaccine angati agütsüba agütsüla, ta paisa ayongzük.

Tanga state tem den medemdangra Nagaland nung testing aser vaccination kanga ajema lir saka COVID-19 puteta

alirtem asübabo asenok teimba lir, ta Tongpang-isa tebilemtsü khuret ka lemsatop.

Nagaland nung Unlock-3 tembangba sülen COVID-19 talenbatem agientsü asü koda ta osangbeneri asüngdangdang "Chief Minister Neiphiu Rio-i aniba High Powered Committee (HPC) on COVID-19-i tensa asadanga sülen ang telemetba agitsü" ta Minister Tongpang-isa langzü.

"Kohima nung tensa tajungba mekümra, lockdown tenokdangbatem agütsüsü" ta Deputy Commissioner & DTF Chairman, Gregory Thejaweli-ia ashi.

"Kohima nung taoba hopta ishika positivity rate 10% tema lir anungji tenokdangbatem alitsüla" ta Chief Medical Officer, Dr Vezokholu Theyo-ia ashi.

Covid-19 menatepba azüoktsü atema DTF Kohima-i nübertem dang Covid inyakyim sülen anidaksü, tendangtsü aser vaccine agitsü osang sangoktsür, ta laisa ashi.

"Brihostibar tashi nung Kohima district nung nisung 1,13,099 COVID-19 vaccine agiogo aser iba nungi nisung 18,634-i dose anaprong agiogo" ta CMO Dr Vezokholu-isa ashi.

COVID-19 vaccine peria dang lir anungji arishi küm 18 ser temapur ajaki vaccine agitsü ayongzük, ta laisa shisem.

COVID-19 Nagaland: 92 dak putet, 77 taneptsü angu & 1 asü

Kohima, July 23, 2021 (TYO): Hokolbarnü Nagaland nung nisung 92 dak COVID-19 putetba züngsema nisung ajak agi 27,116 kümogo.

"Tanü nisung 92 dak COVID-19 putet. Parnokji Kohima nung 33, Dimapur nung 24, Mokochung nung 12, Mon nung 8, Wokha nung 5, Kiphire nung 4, Tuensang nung 3, Phek nung 2 aser Peren nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 puteta anepalur nisung 77 taneptsü angu. Parnokji Kohima nung 24, Dimapur nung 20, Zunheboto nung 8, Mon nung 7, Longleng nung 6,

Mokokchung nung 5, Wokha nung 4, Peren nung 2 aser Tuensang nung 1 lir. Parnok züngsema nisung 24,571 tashi taneptsü nguogo" ta paisa ashi.

Nagaland nung COVID-19 nungi taneptsü angurji 90.61% lir aser tang nisung 1,251 anepaludar, ta Dr Kikon-isa ashi.

Hokolbarnü Dimapur nung COVID-19 puteta alir ka asüba züngsema tasür ajak agi 537 kümogo saka nisung 14 bo tanga tashidak ajanga asü, ta paisa metetdaksü.

Tang tashi nung COVID-19 alitsü akok ta temolung melemba sample 2,52,809 tendangogo. RT-PCR ajanga 1,01,403, TrueNat ajanga 66,209 aser Rapid Antigen Test ajanga 85,197

tendang, ta Dr Kikon-isa ashi. "Brihostibar tashi nung nisung 5,87,110 nem COVID-19 vaccine indang dose 7,20,849 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,641, healthcare workers 15,951, arishi küm 45 ser temapur 1,78,906 aser arishi küm 18 nungi 44 tsünga alir 3,31,612 lir, ta paisa metetdaksü.

"Vaccine agirtem rongnung nisung 1,339,739-i dose anaprong agiogo. Parnokji frontline workers 37,164, healthcare workers 12,053, arishi küm 45 ser temapur 84,263 aser arishi küm 18 nungi 44 tsünga alir 259 lir" ta Dr Thurr-isa ashi.

NPF-i opposition maliba sorkar akümtsü ashiba pelaa agizüker: Minister Tongpang

BJP-i telemetba kecha magi; Assam CM aser Central lennirtem dang asüngdangyar

Kohima, July 23, 2021 (TYO): Naga People's Front (NPF)-i Nagaland nung opposition maliba sorkar ka akümtsü ashiba pelaa agizüker, ta Independent MLA aser PWD (Housing) Minister, Tongpang Ozukum-i ashi.

"Nationalist Democratic Progressive Party (NDPP) aser NPF indang manifesto tem nung yimten latetra parnoki lenmang lapoktsüsü ta shia lir aser iba nung ni rangloker iba olen jembir" ta pai ashi.

"People's Democratic Alliance (PDA) nung züngsem ka ama nia Naga yimten latetba ya ajak atema tebilemtsü tulutiba aser tongtipangtiba lir ta züngshir. NPF-i Naga yimten latetsü atema süoki ia bilemer süra, nia parnok tebilemba nungiter" ta Tongpang-isa ashi.

Chief Minister Neiphiu Rio aser par party NDPP-i NPF indang telemetba pelashishia agizükogo saka PDA teloktep indang tangatetba nung aliba ama parnok den yariteper BJP den jembiba sülen ang tatembang telemetba ka agitsü ta metetdaksüogo.

Opposition maliba sorkar ka ali nung dang Naga yimten tebilemtsü atema mapa shitak

inyaka otettsü asü koda ta osangbeneri asüngdangdang "MLA 60 prongla külemi longjemra ibaji Naga nunger atema dang masü saka Naga yimten teloktem atema tatishitsü tajung ka asütsü" ta Independent MLA Tongpang-i langzü.

"Onoki iba osang tulu sangoktsünür aser taoba mapang dang nungi tang taliba süoki ia bilemer ta sayunür" ta paisa ashi.

Iba onük atema BJP-i telemetba magiba atema asüngdangdang Minister Tongpang-i ashiba agi pai BJP MLA tem den tongtepratepdar saka shingaia osang tejangja magitsür ta langzü.

Nagaland nung BJP-i national leaders den asüngdangtepa NPF-i ashiba atema telemetba tajung ka agitsü imlar, ta paisa shisem.

BJP tebilemba metettsü atema osangbenertemi Nagaland BJP president aser Cabinet Minister Temjen Imna Along den jembitsü meranger saka makoker.

July 21 nü BJP National Spokesperson aser Nagaland in-charge, Nalin Kholi Dimapur tonga aruba BJP MLA tem aser lennirtem den ajurutepogo saka

telemetba kecha magi ta osang angazüker.

National BJP Spokesperson aser IT, Science and New & Renewable Energy Advisor, Mmhonlumo Kikon-ibo "asüngdangya asüba dang" ta langzü.

Dimapur nung Kholi den olemtepogo saka tatembang telemetba kecha magi ta Nagaland Deputy Chief Minister indang Office nung osang kar ajanga ashi.

Külen, Nagaland Chief Minister Rio, Deputy CM Patton aser National BJP spokesperson Kholi nungertem Hokolbarnü Assam Chief Minister Himanta Biswa Sarma den ajuruteptsü atema Guwahati-i ogo.

Parnokisa BJP central leaders den ajuruteptsü atema Delhi-i aotsü akok.

July 19 nü Nagaland Assembly nung opposition tongtiba NPF-i PDA teloktep nung dennür Opposition maliba sorkar ka akümtsü atema osang sangokja liasü.

July 20 nü Opposition leader aser taoba Chief Minister T R Zeliang-i Chief Minister Rio ket nung PDA sorkar pusemba kulikaket agütsü.

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashiteta, teku ashiba, aketba aser temang metaba timtem lira yakta doctor bushiang.



Tir Yimiyim

COVID-19 azüokba nung nübur shilem tuluba lir: Tongpang Ozukum



Dimapur, Chiteni/July 23 (TYO): Kohima District Planning & Development Board indang Conference Hall, Kohima nung COVID-19 tendangba aser mozü agütsüba indang nüburtem nem tali tejangjaba metetjemdaktsüba sentong tatembangba July 23, 2021 nü agia liasü, kong Kohima District Task Force on COVID-19 den lokti tentet balala aser Kohima nung aliba ward lenirtemi shilem agia liasü. Anogo trok tashi COVID-19 tashidak tendanga mozü agütsüba sentong ya July 16, 2021 nü tenzüka Northern, Southern, Western, Tseminyu area aser Kohima Municipal area tem ajunga awajema agia liasü.

Minister in-charge of Kohima district for COVID-19, Tongpang Ozukum-i iba sentong nung jembiba mapang, COVID-19 wave mezüngbuba nung AKMWP aser ward 19 nungi lenirtem den lungjemer state sorkar aser district administration ajanga iba virus ya azüoktet, ta ashi aser iba tashidak wara den raraba nung yaritepba aser amalitepba atema tenüngsang agütsü.

Ajisüaka wave tanabuba nung nüburtem nungi telangzüba jungrra meliasü aser sorkari ashi mangaba ya tebilemsü tuluka akumer, ta pai ashi.

Northeast nung aliba state tem rongnung COVID-19 agi nisung asüba tsütsü asadanga Nagaland ya tematiba nung lir aser külen tendangba aser mozü agiba tsütsü teküpokba jenjang ka nung lir aser tang yimya nung virus ya menokdangi prokia aonungbo kobi melie lendong tuluba ajurutsü aser wave tasembuba arutsü, ta Minister Tongpang Ozukum-i ashi.

RAMKY-ECI ajanga Dimapur Traffic nem Ambulance ana agütsü



Dimapur, Chiteni/July 23 (TYO): Lenmang nung lendong timtem balala nungi nüburtem kumzüka ayutsü atema ambulance nungdakba ajiteta, RAMKY- ECI Engineering and Construction Ltd. ajanga parnok ya road safety sector nung tongtipang tentet ka ama par corporate social responsibility sentong kübok Dimapur Traffic Police nem ambulance ana agüja liasü.

Commissioner of Police, Dimapur indang office nung July 23, 2021 nü sentong tongmelang ka agia iba gari tsütatepba

Iba atema pai lenirtem dang COVID-19 mozü agiba aser tendangba indang osang nüburtem den lemsateptsü ayongzüka liasü.

Yimtsüng kar nungi hopta shi COVID-19 cases ya maneni züiner aser tesem ajungalen tendangtsü nungdaker, koba kanga tongtipang aser takoktsü lir, ta pai ashi.

Akhi ama yimya dangi arutsü asoshi COVID-19 tendangba ya kanga tongtipang lir, kechiaser iba tashidak menatapa aoba ya timbaka timtem maliba nisungtem nungi menaloka aor, anungji timtem meliaka tashidak keta aliba jangjatetba ajanga iba virus azüoktsü atema tongti shilem agir, ta Ozukum-i ashi.

Paisa, shidak angatetba aser bilemba nüburtemi pei temeden shisa kaa amshia pei aser dangartem asoshi bilemja maparen inyaksüla, ta ashi aser Kohima nung medical team aser facility tajungtiba lir asünung administration aser lokti tentet balalai iba maongka agia virus azüokba maparen nung shilem tali agütsü ayongzüka liasü.

Iba sentong nung Advisor, Technical Education & Election, Medo Yhokhain-ia o tatsüka jembiba mapang tang tensa azüoktsü asoshi dangar dak alia mera balala agiba atema Minister in-charge aser lokti tentet balala dang pelaba lemsatapa liasü.

Virus ajema akumba ajanga Unlock meratem ya benokba masü saka nungdak asüba ajanga benok aser asenok wave tasembuba nung mejakloka aier asünung, tebilemsü khuret jenti alitsü, ta Yhokha-i ashi,

Nüburtemi khuret angatetsüla, anungji ward ajak nung SOP akang-akanga

amshitsüla aser sorkari lateta aliba ozüngtem shidak amshitsüla, aji asünung dang ketdangsurtemi tenokdangba tali tesashiba magütsütsü, ta pai ashi.

Iba ama tensa nung lenirtem ya tatishitsü tajung aketba kaka asütsüla aser virus nungi asenok kumzüka alitsü asoshi nüburtem den tendangtsü aser mozü agütsü ajungshiteptsüla, ta ashi.

COVID yangi lir aser asenok den alitsü, anungji iba mechi asenoki tashidak den külemi alitsü angazüksüla aser yimya sübatsüla, ta Deputy Commissioner Kohima, Gregory Thejawelie NCS ajanga ashi.

Iba tashidak wara ya ajanga nüburtem libaliru kanga melenshiogo aser iba ya ajanga healthcare, rongsenketzüng nung kodanga majangshidangba ajangshia arur, anungji COVID-19 tashidak wara tatem kati arudaktsütsü asoshi iba mozü agütsü ya kangasa tongtipang lir, ta pai ashi.

Iba tashidak wara mezüng tenzükdangbo kechiserna ajak agi meperi aser anüng-aponga liasü, saka tangbo lab nunga osettsüset renlokogo, mozü amshiba aser agütsüba tali tajungba kumogo, anungji nüburtemi medical facility mela mela agiteter, ta ashi.

Paisa, tendangba aser mozü agiba kisüng agi iba COVID-19 tashidak wara mokoktetsü, saka ajaki teti mask agütsüla, nisung o nisung tetsünga ayutsüla aser teka müreka alitsüla, ta ashi.

CMO Kohima, Dr. Vezokholu Theyo-ia nüburtem dang COVID-19 mozü indang osang tiaüzü meporoktsü ayongzüka liasü. Junga memetet osang prokshiba ajanga nüburtem tali mangmandaktsür aser osang tiaüzü nung amanger.

masüba nungbo mamshitsü, ta Rothihu-i ashi.

Iba sentong nung ACP Traffic Zone 2 Dimapur, Hentai Phom menden liasü, aser paia ambulance anaprong nung town area aser NH-29 nung ajungben lendong atalokba mapang nungdakba osettsüset peria lir, ta ashi.

Ambulance aliba ajanga gari lendong ajurua alirtem temang anepalutsü atema mozü kidangi benenshiba nung teyari tulu alitsü, ta pai ashi.

Ajidang masü COVID-19 tashidak wara mapang aser nungdakba mapang Dimapur Police nem ajungben medical teyari agütsüba maparen tali tajungba akumtsü, ta paisa ashi.

Sentong nung Pastor, Dimapur Police Baptist Church ajanga iba ambulance ana aser ambulance amshitsüpur atema sarasademja liasü.

Ambulance ana indang sapi ya Company nungi ketdangsurtemi CP Dimapur aser DCP Traffic, Dimapur nem amokja liasü.



OFFICE OF THE
AO SENDEN

H.Q: MOKOKCHUNG: NAGALAND
Ph: 0369-2228896/ e-mail: aosenden@gmail.com

Date: 23/07/2021

SANGDONGER

Wb. Talitemjen Imchen (Mangmetong), Dimapur, pai züluba "Ao Oshi Leni Kaket" koba adoka lir iba ya Ao Senden Executive Committee March 5, 2004 bangzüng No.1 (4) lemtet anema inyakba ajitet nung July 23, 2021 anogo Ao Senden Presidential Council-i pa jaoka keno ajak rateta angateteper pai pa aibelen nangzük nung iba kaket ya tanü nungi shibangtsür. Anungji iba kaket ya kecha nunga mayoktsü aser Ao Senso shingai alia mamshitsü tekümdangtsü sangoktsür.

(Chubawati Longchar)
President

(Imtipokym)
Secretary

Dimapur Excise puri yi cases 490 apu

Dimapur, Chiteni/July 23 (TYO): Itdangiter osang kar nung ajemdaker Dimapur Excise nungi Yangpunrhomo Nguille A.I.E, Tonika A.I.E, Tsuknung H/Constable, Constables Ranglise, Vikaho, Sorenthung, Welikha, Amet, Akho, Lady Constables Amenla aser Kiyerangzaile nungeri July 22, 2021 nü New Field check gate mita ataba mapang aonung 8:30 ako meta Imphal, Manipur

leni aoba gari (Regd. No. NL 05 D 6438) ka soita iba gari nungi Indian Made Foreign Liquor (IMFL) cases 490 nguteta liasü. Item yi ya wanu aser noodles agi yapanger bena liasü.

Iba dak sendakba nung NLTP Act 89 kübok Khatkhathi, Assam nung alir Suraj Rai'er jabaso arishi küm 35 tain Sham Kumar apu aser ken o benoka lir.

Mokokchung DC-i metetdaksür

Mokokchung, July 23 (TYO): July 27, 2021 nü Mokokchung H.Q nung aliba government office nung mapa inyakertem atema Covid-19 vaccination dak sentakba nung angatetshiba sentong ka ayongzüka lir aser ibaji nikongdang 2:00 ako nungi Mokokchung town hall nung akatsü, ta Mokokchung DC,

Limawabang Jamiri metetdaksür. Anungji, office balala nung tokolak puri pei staff shirnok vaccine mozü magii lir, parnok ajak dang iba osangji ashitsüla aser iba sentong nung dendaktsütsüla. Sentong agiba tesem nungji iba anogo registration aser attendance agütsü, ta Mokokchung DC-isa metetdaksü.

Tening sub-divisional administration aser office tekolakpur senden amen

Dimapur, Chiteni/July 23 (TYO): Tening sub-divisional administration aser Heads of Office tem senden ka DB indang court, Tening nung July 21, 2021 nü ADC Tening, Rosietho Nguori lenisüba kübok mena liasü.

asir sorkar totuyuba ama district administration ajanga office attendance mita reprangtsü metetdaksü.

Iba senden nung aruya aliba Independence Day benjongmung indang mapa lema liasü. Ajisüaka sorkar totuyuba nung mapa ajak inyaksü lemteta liasü.

ADC, Rosietho Nguori ajanga iba senden nung sorkari office tem tanaben lapoktsü atema totuyuba agütsüba aser sub-division kübok head of office tem nungi hopta shi attendance osang agütsütsüba indang lemsatapa liasü.

Maneni MO AYUSH, CHC Tening, Dr. Nuksang Jamir-i Sub-Divisional Task Force on COVID-19 tenüng nung COVID-19 mozü agütsüba amala inyakyim indang osang agütsü aser senden nung adener ajak dang COVID-19 mozü agütsü asoshi nüburtem ajungshitsü ayongzüka liasü.

Nüburtem maparen inyaksütsü asoshi mapa inyakba anogo ajak nung office ajunga lapoktsü senden nung lemtet



Sen crore ana dak tema alang yi pua alibatem Hokulbarnü Excise personnel temi Directorate of Excise office, Dimapur nung raksa indoka liasü.



OFFICE OF THE AO STUDENTS' CONFERENCE (AKM)

H.Q. Mokokchung - 798601 : Nagaland
Regd. No. Rs. 3072
"For the Nation"

Ao Kaketshir Mungdang mendenti ajanga asen Aor Kaketshirtem NBSE ajanga agiba HSLC aser HSSLC tatidang nung kaketshirtem rongnung alakteta temaba jenjang nung takok angurtem nem tenüngsang aser aküm tulu agütsür.

| HSLC | | | | | | |
|-------|-----------------------|-------------|------------|--------|--|--------------|
| Sl.No | Name | Total Marks | Percentage | Rank | School | Village Name |
| 1. | Talinungsang Imchen | 587 | 97.83% | Top 3 | Queen Mary Hr. Sec. School | Mangmetong |
| 2. | Yimyatetla Longkumer | 587 | 97.83% | Top 3 | Holy Cross Hr.Sec. School, Dimapur | Changtongya |
| 3. | Yangertemjen | 586 | 97.67% | Top 4 | Saint Savio School, Chumukedima | Yaongyimsen |
| 4. | Tiamaong Aier | 582 | 97.00% | Top 9 | Don Bosco Hr.Sec School, Dimapur | Sungratsu |
| 5. | Longtila Jamir | 581 | 96.83% | Top 10 | Model Hr.Sec School, Kohima | Changtongya |
| 6. | Talisangla Longkumer | 581 | 96.83% | Top 10 | St. John Hr. Sec. Residential School, Dimapur | Mongchen |
| 7. | Moanola Longchar | 580 | 96.67% | Top 11 | Town Hr.Sec. School, Mokokchung | Lirmen |
| 8. | Limatongzuk Longkumer | 580 | 96.67% | Top 11 | Straightway Hr. Sec. School, Mokokchung | Longsa |
| 9. | Sentienla Yaden | 580 | 96.67% | Top 11 | The Vineyard School, Kohima | Merangkong |
| 10. | Mongdikokba Walling | 579 | 96.50% | Top 12 | Fernwood, Kohima | Khar |
| 11. | Aotushi Imsong | 579 | 96.50% | Top 12 | Ministers' Hill Baptist Hr.Sec School, Kohima | Ungma |
| 12. | Ochien | 579 | 96.50% | Top 12 | St. John Hr.Sec. School | Mopungchuket |
| 13. | Yashijungla | 576 | 96.00% | Top 16 | Christian Standard Hr.Sec. School, Changtongya | Changtongya |
| 14. | Wangshirenla | 574 | 95.67% | Top 19 | Northfield, Khikha | Sungratsu |
| 15. | Imlijungba Aier | 573 | 95.50% | Top 20 | Little Star Hr.Sec. School, Dimapur | Yajang |

| HSSLC (Arts) | | | | | | |
|--------------|---------------------|-------------|------------|-------|--|--------------|
| Sl. No | Name | Total Marks | Percentage | Rank | School | Village Name |
| 1. | Imlisungla Pongen | 484 | 96.80% | Top 1 | St.Paul Hr.Sec. School, Dimapur | Longmisa |
| 2. | Yimtiyong Longkumer | 458 | 91.60% | Top 7 | Unity Christian Hr.Sec. School, Diphupar | Ungma |
| 3. | Chubatola | 456 | 91.20% | Top 8 | Christian Hr.Sec. School, Dimapur | Sungratsu |

| HSSLC (Science) | | | | | | |
|-----------------|--------------------------|-------------|------------|-------|---------------------------------------|--------------|
| Sl. No | Name | Total Marks | Percentage | Rank | School | Village Name |
| 1. | Imcharenba Atsongchanger | 467 | 93.40 | Top 6 | Queen Mary Hr.Sec. School, Mokokchung | Mokokchung |

Ano Aor Kaketshir shirnoki Subject balala nung NBSE kübok state subject toppers aser kaketshir shirnokisa 2021 HSLC aser HSSLC nung takok tajung nguoko, nenok ajak nem Ao Kaketshir Mungdang Mendenti ajanga takok tepela aser tenüngsang agütsür.

Nenok mapa tajung aser meranga inyakba tejang tangtetogo ta Tsüngrem tenüng asanger. Tsüngremi nenok kija taküm shia Kaket shisaliok angazükba wadang nung maneni moajang ta AKM sarasadem.

Sd/-
NUNGDOKYANGER AO
President



CHUBAMEREN IMCHEN
Education Secretary

Manipur HC-i journalist Wangkhem chioktsü tuyur

Imphal, July 23, 2021
(Agencies): Manipur High Court-i journalist Kishorechandra Wangkhem chioktsü atema tetuyuba agütsüogo. Pa ya Manipur Police-i National Security Act (NSA) kübok tai tonglokja apu. Taoba Manipur BJP president S Tikendra Singh

COVID-19 ajanga indang Facebook post ka asüba atema Frontier Manipur nung journalist Kishorechandra Wangkhem dak tai tonglokja apu. Manipur High Court nung Chief Justice PV Sanjay Kumar aser Justice Kh Nobin Singh na adenba bench-i tanü nikongdang 5:00 ako tashi nung

Kishorechandra Wangkhem chioktsü tetuyuba agütsü. Supreme Court-i tuyuba nung ajemdaker taoba Hombarnü Manipur activist Erendro Leichombam chiokogo. Kishorechandra Wangkhem aser Erendro Leichombam na ya anogo ka nung apuba liasü.

BJP MLA Rupjyoti Kurmi anema FIR benok

Mariani, July 23, 2021
(Agencies): BJP MLA Rupjyoti Kurmi-i COVID-19 inyakyim aliba inyakba atema All Assam Tea Students Association (AATSA), Mariani branch-i ken o ka benokogo.

Bharatiya Janata Party (BJP) nung aden aser pai nisung 250 tema adenshia rally tem ayongzüka agi. Iba ya Assam sorkar indang Disaster Management Act 2005 alema lir, ta AATSA-i ashi.

Mariani Police Station nung parnoki Kurmi anema FIR benok. COVID-19 kanga menatepba atema Assam nung Jorhat dena district trok tashi 'full containment zone' nung lir. Rupjyoti Kurmi-i taoba ita

"MLA-i Covid-19 inyakyim sülen anidaksü atema mebilem. Tashi sayutsü atema pai virus menaba memeteti nisung lokti adenshia sentongtem agi" ta Mariani AATSA Advisor, Deepak Tanti-i ashi.

"Ozüngji ajak atema kasa asütsüla. Public, yimsüsür mesüra sorkar mapa inyaker süang, tebendang malitsüla. Rupjyoti Kurmi-i inyakba mapa aitsür aser sorkari ozüngi melaba ama pa merenshitsu imlar" ta paisa metetdaksü. Sentongtem nung State Power Minister Bimal Bora-ia shilem agi, ta AATSA-isa ashir. Anogo ishika tejaklen Kurmi-i par constituency nung COVID-19 inyakyim



Guwahati nung vaccination centre ka nung nisungtemi COVID-19 vaccine agitsü atema tarensena noktaka ataba angur. (Guwahati, July 23)

Tripura nung National Forensic Science University campus lapoktsü

Agartala, July 23, 2021
(Agencies): Tripura nung kobi melii National Forensic Science University (NFSU) indang campus ka lapoktsü.

NFSU indang executive registrar, CD Jadeja-i iba atema Tripura chief secretary Kumar Alok dangi shidi ka züluogo.

University-i Tripura chief secretary dang Tripura nung academic programmes tenzütsü atema para agüja ki ka bushitsu asüngdang.

Par ki nungji classroom 15, hall 5, administrative staff atema takdang 5 aser kaketnang ka alitsüla ta Jadeja-i shidi nung shia lir.

National Forensic Sciences University ya taoba mapang

Gujarat Forensic Sciences University liasü aser iba ya Gujarat sorkari shisateta lapokba lir.

Taoba Gujarat chief minister aser tang Prime Minister teinyakdak Narendra Modi-i iba university lapoktsü.

Tang iba university indang campus ana- Gujarat aser Delhi nung lir. Gujarat campus dang National Forensic Sciences University ta ajar.

Külen, NFSU indang Delhi campus dang 1991 küm National Institute of Criminology and Forensic Science (NICFS) tenüng melen aser iba sülen ano 2003 nung Lok Nayak Jayaprakash Narayan ta melenogo.

Assam nung taila doctor ka apu

Baksa, July 23, 2021
(Agencies): Baksa district kübok Tamulpur nung Assam Police-i Physiotherapy diploma holder kati doctor jilu benshia inyakba atema puogo.

M.K. Das (Monojit Das) yagi Narayan Medical Store & Astha Clinical Lab ta ser pharmacy ka nung private chamber ka lapoka liasü. Iba

pharmacy ya Kumarikata State Dispensary anasa lir.

Das-i küm aika shirangertem dak tendanga aru, ta police-i ashi. Sub-Divisional Officer, Tamulpur Dr. Bedanga Talukdar tetuyuba kübok Assam police-i taila doctor apu.

Pa pharmacy nung lia apu aser Tamulpur Police Station-i anir oa FIR benok.

Mizoram nung Covid-19 indang variant 3 putet

Aizawl, July 23, 2021
(Agencies): Mizoram nung nisung 75 dak Covid-19 indang variant tapu asem putetogo, ta health department ketdangsur kati ashi.

"Nisung 73 dak India nung putetba Delta variant (B.1.617.2) putet aser nisung ka dak United Kingdom indang Alpha (B.1.1.7) aser ka dak Eta (B.1.525) aliba putet. Iba ya sample 100 tendangba nungi liasü" ta State nodal officer & Covid-19 atema official spokesperson Dr. Pachuau Lalmalsawma-i ashi.

Sample temji June ita West Bengal nung aliba National Institute of Biomedical Genomics (NIBMG), Kalyani nung tendangtsü atema bener yok, ta pai ashi.

"Sample 100 nungi 73 dak Delta variant, ka dak Alpha variant aser ano ka dak Eta

variant putet" ta Dr. Pachuau Lalmalsawma-i ashi.

June 18 nunga Mizoram nung nisung pezü dak Delta variant aliba puteta liasü. Ajisüaka, Aizawl district nungi nisung pezüprong taneptsü nguogo.

Maneni, tan July ita nunga sample 150 tendangtsü atema bener yokogo aser iba osang ano mangu lir, ta Dr Pachuau-isa ashi.

Tanga variant tem dang nungi Eta variant dak lendong tuluba keta lir kechiyong iba variant agi shiranger 69% tashi Intensive Care Unit (ICU) nung anepalutsüsa akümer, ta paisa metetdaksü.

Delta variant putetertem rongnung 0.1%, Alpha variant puteter rongnung 2% aser Eta variant puteter rongnung 2.7% shi taküm samar, ta Dr Pachuau-isa ashi.



TIR YIMYIM YIMOBILEM (EDITORIAL)

DIMAPUR KÜPTOKNÜ CHITENI (JULY) 24, 2021

Artsü aser Tenemtsüng lenmang

Tang Tsürangkong tsütsü Assam den artsülen timtem adokba tensa tia reprangdangtsü asoshi Nagaland nung tang yimten telok (political party) tasen tentetba Rising People's Party (RPP) purtem tsüngdong oagi nüboritem den ajurua jajaba mapa jagi tanga yimten teloktema ajungshir alitsü imlar. Kasa alisa süaka Nagaland o Assam na tsüngda ali madak kibur akümba sobaliba yimya balala lir. Assam tsütsübo ali kiburji Assam government saka Nagaland tsütsübo ali kiburtemji kija aser kibongtem lir, kechiyong Nagaland nungbo mezünyongi government li mali, anungji government ali nüngdak dang kija (nija) dang alir. Atangji, Nagaland nunga government meyong arem wazüka ayuba tesem karbo lir saka itemjia nisungtemi atsüngsepa agimadagi. Aji oda, talisa Assam den artsülen Nagaland government li maliba agi, ashiko, Tsürangkonglen dang masü saka tangalena Assam police-temi Naga nunger kiojen bendoka atudang Nagaland government-ibo kanga süoki ia mebilemer südi ta bilemer. Artsülen dang masü saka Nagaland nungbo Tsürangkong tiyong nung Assam police camp lir, iba atema kenüa shingaiia Nagaland tatar senden nung ken o benoka jembiba mangashi. Joko, Assam tsütsübo artsü sema Assam police tesep yanglua alitsü Assam government sentong lir saka Nagaland tsütsübo artsü kümzüka ayutsü atema sentong tasen renemba osangbo kecha mangashir. Aji oda, Assam aser Nagaland na tsüngda artsü nung mangatettep adokba ya, kodang jungjunga reprangdangdir, government o government na tsüngda masü saka Assam government o Naga public na tsüngda rarar amai reprangtetter. Iba jagi Nagaland-i makok aiben Assam police-tem nem Naga nunger lu aser kiojen amokbangdaksür. Iba tensa tiaji khen jungjunga government nung alirtemia aser nüboritemia bilemdanger, Assam nunger ket nungi artsülen Naga nunger lushi kümzüka ayutsü asoshi asenok ali madak kibur akümba yimya ya melenshir, Assam nunger den mangatettep aliba lushi ajakji Nagaland government li kümer, yangji Assam nunger amaji Nagaland police traing center tapu balala lapokiyonga ao nunga ajungtsü südi ta bilemer. Ano, Assam nungertemi artsü nung timtem agütsüba ajanga asenok nübo, mapang aser rongsen nung takoksa majurutsü atema tenemtsüng lenmang (Foothill road) ya akok tashi tekaratiba nung renemtsüla. Iba lenmang ya Kohima len alirtem asoshiibo kangabo nüngdak madoker, saka talisa Mon, Mokochung, Longleng aser Wokha district nung alirtem asoshiibo alima nung taküm jangratema alitsüba lenmang tongtibangtiba lenmangji ya lir. Atangji, iba tangatetba nung Foothill Co-ordination Committee purtemia kanga meranga government den nüngsenbangsen jenti agia tongtepratepa inyakba angur. Iba ola jagiang tang tashi nung inyaka aoba mapatem ya inyaker. Ajisüaka, Committee purtemji nüboritemi ita sen agüja inyakdaksür masü aser parnok kisüng lenmanga masü saka Naga nunger yimkong jajatsüba lenmang, anungji iba tenemtsüng lenmang yamai merenemteti züdaka mayui Mon, Mokochung, Longleng aser Wokha district-tem nung aliba nüboritemia ola adoktsüla. Asen lima nungbo kümli ajunger ajungdakbo kecha maka, anungji nüboritemi longkak aita ola madok tashibo kecha mataloker. Atangji, government sentong nungbo foothill road nungji khen nung gari pezü pongo tashi tsüiteptetsüsa yanglutsü enoka alitsüa akok, saka iba sentong tulubaji matalok dang tang ama artsülen timtem atalokiyonga asen sentongbo methitemi inyaka otettsüsa gari ana tsüitepshi lenmangbo menua melii renemtettsüla. Asen lima tilaka nung ya nüboritem asoshi terenlok mapatem kechisa inyakdar ta reprangdangra, kecha nunga long ka ta meyipa mangur. Tang asenok taküm aliba yabo kar relief jang agi aser kar government ita sen anguba agi taküm alir. Iba tiaji kodang jungjunga bilemdangdir, asenok alima nung taküm aliba tetezü aser nükjidong kecha maka tebok süngra ojang ta ser alir amai asenok alir ta rajemtettsü. Alima nung ya chiyongtsü asoshi alir masü saka mapa inyaksü asoshi chiyonger, anungji chiyonger mapa inyakdak akatsüsa asen lima nung asenoki tamasa foothill road ya lapoktettsüla aser iba lenmang songa electric light aotsüla. Ibaji danga government-i inyaksüra, iba foothill lenmang ajanga rongsen agir magima jateta adokdaksütsüabajibo lanurtem mapa asütsü. Asenok Assam ajanga senzütsü mechi asenoki tang ama artsü dak aketba ken o Assam den tasü itta mejembitet tashi, parnok temulung tuluba tuluba akümtsü aser asenok tilaba tilaba akümtsü. Tang tangbo maparen aika nung asenok parnok dak metaloker alir. Aji oda, chiyongtsüa par lima nungi bener atutsü aser lenmanga par lenmang nung mejajara tejajadak maka ta asü tashi, artsülen anogo shia tesem ka nung mesüra ka nungbo parnok nem asenok karbosa mezünyongmeshidaksütsüsa akümtsü.

OLEMSABANG

Onük: "Covid 19 Wara ya kar Asoshiibo Takoksa nungi Temoatsü Asütsüa Akok"
(Covid 19 Pandemic can be a Blessing in Disguise for some people)

Mr. O. Sashi Ozüküm Kohima

"Novel Coronavirus" koba dang "Covid 19" ta ajar ya 2019 küm tatemlen China lima Wuhan yimti nungi tenzükba "Mesen" (Virus) ka koba agi alima ajak morok mi ama runga aoba tanü tashi manener. Iba wara asen lima 2020 küm March Ita tiyongtsü ka nungi tonga arua lokti sentepba aser tekülem ajak anener arudagi. Lokti tekülem sentep anenaka ni amanger sannükertembo metitemi tanü tashi tekülem ki azüngmeyaka medoktsüi agiyonga arua alitsü ta amanger. Ozü kibong den fellowship chowkidar onok maneni Bodhbar, Honibar aser Deobar tekülem ki lapoka sarasademi aodang kü mulungjang nung teti tasüngdangba ka arubaji, "Kechiba Covid 19 wara ya ajanga tekülem ki yamai azüngmeyakdaksür?" ta temulung nung jembia alidang "Covid wara ya kar asoshiibo takoksa nungi temoatsü asütsüa akok" (Covid 19 Pandemic can be a blessing in disguise for some people) ta asüba onük nungi ocet tatsüka zülutsü kü molung nung aiben ajungshi nung tazüngertem ajak temoatsü kakabo angutsü imlaa lemsateper.

Nisung aikati Covid 19 Pandemic ajanga "Lockdown" dak ya tajung kecha mali ta ashir. Nia hau asür, kechiyong asenok dangi iba wara ajanga timtem touthi, shisabulu, tajemzük, takoksa, tesama, mangyim jashi ano shisabuluba aika bendenlokja arudagi.

1. Covid wara ajanga meimchirtemi koma takoksa ajurur ?

Iba wara ajanga asen adianu, tsürapur, chirnur, medemer, yimtsür yimer taküm tajung aika asü yimi luogo. Iba wara agi metongaka tashidak aketer cancer, kidney, TB, diabetes ano tashidak balala agi shiranger kwika anepalu (Treatment) junga mesüteti tapayutsü temeimba taküm aika süogo aser ano aika timtema lir. Wara ajanga nisung kwikati mezünyongmeshiba, jendokadokba ama yutsüba, azüngmeyak tia nung asen kija ama, loktiliba nung meimchir tsüngda mesenmetoi sendokadokba aikati ajurua arudagi. Ano aria bilemaka temeim mesayutettsüsa doktsüba wara koba agi pei temeimbatem mangjaka (dead body) mongui ali telong nung memetetba nisungiang remtsütsüsa tia aikati ajurua arur, karbo teyaritepera mali apuani, chirnur aser tsürapur kijai adianu kinunger tasü mang remtsüba asenoki social media balala ajanga nguogo. Asen Naga nungera dena pei lima süaka talidak ki maka yimti yimdong nung aliba ngua arudagi.

Iba Lockdown ajanga anema liaka ahyangertem aser shishilembartem kechaia mouteti temulung zürepa kidang dang amoktsüsa akümba tensa ka nung lia arur. Lanurtem kakat rijusanger shisaluyimba lenmang nung koda takoksa online, offline ajanga tesayurtemia meranga sayuaka shisaliok tajungtibabo (Quality education) mangur. Kibong nung tanur kakatshir ajak nem online classes mechi Smart Phone alitsütsüsa akümba tebilemetsü. Ano ya ajanga tanur aika mobile games addiction akümer. Kakatshir kwika tazüngba nung joko over-aged akümer. Haune, sorkari tazünger ajak nem mapa (Job offer) magütsütettsü, saka tazünger aika lemdadar. Sorkari department balala nung mapa tasen (Fresh/New appointment) adokba yaa ta mangur.

Rongsen Kettsüng (Economy) koba tashi ajemzüka alur? Joko osettsüset ajak nung jenjang tesüngmangtsü sakaa kümogo. Tashiyim agi inyakba tensa aikati ajurudagi. Tatishitsü agi, tashiyim agi merenshiba, azükba, rakzükkraktemba, jenjang tali meshiba, amokmerenba ano aika lir, iba wara ajanga ashi aura jenti züiner.

2. Asenoki kümdangtepaka ano aikati mekümdangjembatem (Negligence) kar bushidangra.

Covid symptoms-bo lir sürnung temetetertemia tena tetsübu nung Covid test masüba (Metendangba) agi pei taküm dang masü tangara timtemi yokba aika alitsü südi. Aikati züba-züba dang (Carefree) Mask memelentepi tagiba ka dang amshiba mesüra mapang shia shidoka mamshir. Tesem ajak nung hand sanitizer yuja liakasa asenok aikati mamshir. Shishilemba tesem nung telok telok nungtepba shishilembatepba. Telok tila sentep dangbo social distancing maintain süaka senshidangbo nungtepba senshiba yimya, asüpila sentep nung lokti kecha tarendak makai nungtepa sentepba amala, ano sali moko yimti yimdong nung mashii chia mesepa mashi nung metsü metsüba amala. Oda asenokbo medemerji kiyonger dangji mesüra adianuji ta züba-züba ajurtepdang Mask sepzükba. Asenoki aiben medemer, adianu tsüngda ajurtepdang aikati asenokbo Corona maliar ta ser salemdini (Hand shake) ta asüba, saka asen dak Corona lira malia ta aseni memetet.

Aikati Covid Vaccine anema bilemba mesüra jembiba amala, iba vaccine ya aseni maginüra pei mulung, saka ya Medical Scientist-temi mashika (Randomly) yanglubabo masü. Tetendangba aika (Trials after trial) agir dang approved asüba lir. Anungji vaccine agibajiangsa tekümsüklenbo tuluba tajangzük lir ta metettsü tim. Covid wara ajanga meimchirtemi timtem, shisabuluba aser takoksa ajuruba kuli bushira kodanga mezünyongmatsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Christian child welfare ministries-i lajartem yaritsü mepishir



Christian Alliance for Orphans senden amendang tangokba noksa nung angur.

July 23, 2021: Coronavirus tashidak ajanga alima nung nisung million 4 dak tema süogo, aser ibaji ajanga tanur aika lajartem kümogo, ta report tasen ka ajanga metetdaksü.

Taküm April ita tashi nung arrshi küm 18 ser tekubok tanur million 1.5 shibo tetsü, tebu, kinünger mesüra parnok reprangertem coronavirus tashidak agi asüba ajanga parnok repranger melii lajar kümogo, ta kasa report nung shia lir.

"Children: The Hidden Pandemic 2021," report ajanga ashiba agi, coronavirus wara ajanga tanur karbo taküm piyong atema jenjang raksaogo.

Anungji alima tesem balala nung linüktemi coronavirus tashidak agi tsüraburtem asüba ajanga lajar akümer tanurtem yaritsüla.

Khristan yimsü dak sendakba Child welfare organizations balalai Faith to Action Initiative leniba kübok Arogotem dang wara ajanga lajar akümer tanurtem yaritsü mepishir.

Item organizations rongnung Christian Alliance for Orphans, Bethany Christian Services, World Without Orphans aser Faith in Action densema lir. Parnoki Arogotem dang lajartem orphanage home balalai meyoktsü atema lajartem yariba kibongtem senotsü agi yaritsü mepishir.

Faith to Action Initiative executive director, Elli Oswald-i, Tsüngremi kibong ka meimba mapa inyaksü aser orphanage home nung mayutsü atema lajartem yaritsü asoshi tesem tajungtibaji Arogo lir, ta metetdaksü.

Tamalen Christian Post den interview ka nung jembidang Oswald-i, alima nung lajartem tebilemtsü onük ya bentettsü akokba tebilemtsü ka lir; lajar ka yaritsü atema kibong ka yariba dang nungibo orphanage mesüra children's home yaribaji tasakba, ta metetdaksa liasü.

Laisa, "Orphanage Home nung staff tem nem itasen

agütsüba, facilities balala agütsüba aser tanurtem nungdak ajak peritsüba den program balala nung sen jenti indoker, ajisüaka lajar yariba kibong ka nem teyari agütsüabajisa temelaba," ta metetdaksü.

World Without Orphans principal coordinator, Karmen Friesen-i sangdong ka ajanga, "Coronavirus wara ajanga lajartem aika kümogo, anungji alima linüktemi iba tebilemtsü atema inyaksü nungdak," ta metetdaksü.

"Ajisüaka tan tensa yabo tanga mapang emergency tensa ama masü, tangbo asenoki mapa tajung inyaksü maongka angur," ta Karmen-i ashi.

"Tang mapang ya kibongtem tashi itshidaktsütsü aser orphanage masü saka kibongtem anepalutsü mapang ka lir. Tang ama rongdak mapang nung Arogotemi timtemba kibongtem yaritsüla," ta lai ashi.

Bethany Christian Services CEO aser Tir, Chris Palusky-i, "Kibong ka nung tanur ka meima aser anepalu anitettsü atema Tsüngremi tanur ajak nem temeden agüja lir," ta ashi.

Paisa, alima nung lajar million 1.5 yaritsü atema orphanage masü saka lajar anioka yariba kibongtem yaritsü nungdak, ta ashi.

"Laishiba ajanga alima nung Yisu sülen anidakertem dang lajartem anepalutsü atema shia lir. Onoki Khristantem dang timtemba kibongtem tashi itshidaktsütsü mepishir, kibongtem longjemdaksütsü aser lajartem orphange nung masü saka kibongtem nung anepalutsü atema yaritsü mepishir," ta paisa metetdaksü.

Christian Alliance for Orphans Tir, Jedd Medefind-i, "Lendong aser timtem tensa ajanga tayongzükba tulu bener arutsür aser yamaji maongka-a tulu bener arutsür. Linük shia nung Arogotem tajaba lir aser alima nung temelenshi bener arudaksütsü tajaba lir. Teraksa kibongtem longjemdaksütsüla,

timtemba kibongtem tashi itshidaktsütsüla aser nungdakba mapang kibongtem nung tanur agizüktsüla," ta ashi.

"Children: The Hidden Pandemic 2021," report ya Centers for Disease Control & Prevention, USAID, World Without Orphans aser World Health Organization, World Bank aser higher education institutions nungi child welfare mongintemi renema liasü.

ANOGO ABEN TSÜNGREM DEN

Maaker

"kechiyong osangtajung asoshi ni maker... ajak kümzüktsü Tsüngremer ain lir." Rom 1:16

Saul, Khristantem asoshi anemer tesashi taküm ka liasü. Kodang pa den yisu Khrista tashi ajanga tanela temeshi-i apu Saul tesashi, özüng meteter to masü saka Paul Tsüngrem lar pai osangtajung asoshi maaki jembiba, inyakba liashiba nung angutsü. Tanü lesson azüngba nung tangazüktsü ka angur. Tesüiba taküm indang nung sasa bilema, lirepa aliba masü. Saka akasor Tsüngrem tashi nung inyakba temelenshi kuli Pauli tamanger dang lemsaba angur. Tsüngrem asoshi aikati kuli agütsür aser pela-a alir saka ano tesümgangtsü kaji ano kari kuli asütsü tsübur, aaker, temulung moulur.

Arogo nung inyaka arudang Tsüngrem tenzüktsü asoshiasügdanger saka "aya ma kecha metenzükli takümbo" ta küm shia ashiba tamanger aikasa ajuruogo. Saka ano külenbo parnokji ang alima wadang nungbo yakbang sür kanga meranga inyakba lir. Alima maparen, kibong,pei taküm wadang aser arogo ajak küleni liru medema metemepa inyakra koda tajung. Alima khuret abentsüjia kanga junger saka asen asoshi tatem tshi ajangzüktsüabajibo Osangtajung sangdongba mapa kuliji lir. Na koda?

SARASADEM:

Osangtajung asoshi ni tasü aittsü nai ni merüketjangma. Amen

Uttar Pradesh nung anti-conversion özüng kübok Khristan 12 apu

July 23, 2021: Uttar Pradesh nung anti-conversion özüng kübok July 18 nü Khristan 9 apuba sülen jail nung puok; parnoki anti-conversion özüng tasenba alema Hindu nung kangshia Khristan yimsü dangi meyidaksü, ta parnok nem tai tonglokja liasü, ta International Christian Concern (ICC) osang ajanga metetdaksü.

July 18 nü apuba Khristantem rongnung Sadhu Srinivas Gautham-i, "Gangapur nung Khristantem sarasadem sentong ka agiba mapang nung Hindu yimsü alia amanger 25 aru, aser parnoki onok dang 'nenoki Hindu nung kangshia Khristan yimsü dangi meyidaksür', ta onok nem tai tonglokja liasü," ta metetdaksü. ICC den jembidang Gautham-i, "Parnoki kü dang kanga jashia liasü. Parnoki ni iba tesem nungjisa tepsetnüa liasü, ajisüaka police arua onok police station-i anir ao," ta metetdaksü.

Gautham densema Khristan tenet police station-i anir ao aser jail nung puok.

"Police officer aser district ketdangsertemi onok dang, 'nenoki India nung sobaliba yimsü- Hindu yimsü toktsür bendanger yimsü agizük' ta onok dang ashi. Parnoki onok dang Khristan yimsü toktsür Hindu yimsü dangi meyipang ta tuyu," ta paisa ashi.

Parnok ajak anogo asemnü jail nung puokba sülen bail nung chiokogo.

July 18 nüsa Uttar Pradesh



Yaküm November ita nung Uttar Pradesh nung anti-conversion özüng tasenba agizükba sülen Azamgarh district nung iba özüng kübok Khristan asem apuba noksa nung angur.

kübok Bahraich District nung Pastor Dinesh Kumar aser Khristan, Ghanshyam na sarasademba mapang nung Hindu yimsü alia amangertemi tena dak azük aser parnoki UP nung anti-conversion özüng alema inyakogo, ta tai tongloksü.

Anogo asemnü lir July 21 nüa Uttar Pradesh kübok Padrauna nung Khristan asem apu. Pastor Jeyawant, pa kinüngtsü aser teno nungeri lajartem anepaluba Orphanage ka lapoka lir, ajisüaka sorkar ketdangsertemi iba orphanage mita aoba sülen par asem apuba den lajar 24 densema police station-i anir oa liasü.

Tawa ICC-i, Uttar Pradesh nung anti-conversion özüng tasenba kübok Khristan 18 puogo, ta sangdonga liasü, saka July 18 aser July 21 anogotem nung Khristantem apuba sülenbo iba özüng kübok tang tashi nung Khristan 30 puogo.

Tashiyim amshia mesüra tim

masüba ajanga tamangba yimsü meyidaksüba anema yaküm November ita tatembanglen Uttar Pradesh Angh, Anandiben Patel-i state nung anti-conversion özüng tasenba- Uttar Pradesh Prohibition of Unlawful Conversion of Religion Ordinance, 2020 agizüka liasü.

Kangshia tamangba yimsü meyidaksüba, mesüra tamangba yimsü meyidaksütsü atema kibong akümba densema tim masüba lenmang ajanga tamangba yimsü meyidaksüba iba özüng ajanga nokdangtsü, aser aibelenertem küm 10 tashi tepuokdak ayutsü akok.

Iba özüng ajanga ashiba agi, "Tamangba yimsü meyiptsü atema dang tetsür kati kibong aküm süra iba kiyimbaji magila kümtsütsü, aser kibong akümba sülen tamangba yimsü meyipnertemi district magistrate dang tama asügdangtsüla."

OLONG PAITEP # 5884

| | | | | | | | | | | |
|----|---|----|----|----|---|---|---|----|--|----|
| | 1 | | 2 | | | 3 | | 4 | | 5 |
| | | | | | | | | | | |
| 6 | | | | | | | | 7 | | |
| | | | | | | | | | | |
| | | | | | 8 | | 9 | | | |
| | | | 10 | | | | | | | |
| 11 | | | | | | | | | | |
| | | | | 12 | | | | | | |
| 13 | | 14 | | 15 | | | | | | 16 |
| | | | | | | | | | | |
| 17 | | | | | | | | 18 | | |

- | | | | |
|------------------------------|-------|------------------------------|-------|
| TIPIEN | | LANGTSÜNGLEN | |
| 1. Inyaker ajangtetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S _ _ _ _ | - (4) | 8. Yagi ayimer saka ozü masü | - (3) |
| 13. Yagi ajak ashioktsür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. Ak shi nung inokba tasen | - (5) | 14. _ _ _ hi | - (3) |
| 18. Ishika | - (3) | 16. Akümlü nungi pilar | - (3) |

OLONG PAITEP # 5883 TELANGZÜBA

- | | |
|---------------------------------------|--------------------------------------|
| TIPIEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük. | 12. Sempa, 13. Jahaz. |

Noksa nung meputepi aliba 10 bushiang



TANÜBO NAI LANGZÜANG

Q. Arogya Rakshak ya _____ ajanga tenzük.
 A. LIC B. RBI C. SBI D. None
 _____ (Taruba adok nung onoki langzüsü)
YASHI ADOK TELANGZÜBA : 2013

AO OSHI ANGAZÜKDAK:
TANÜ ANGAZÜKTSÜBA OJANG

Kilep
 (v) metonga aliba kirakdaksü (bend)
 * Warok talangka ina tur talak nungi kilepa alur.

Kilep
 (n) tsürabur arür leper naroküm, kilung nung alepba
 (title of a warrior, who killed enemies inside their camp)
 * Kü tenüng Kilepba lir.

Tir Yimyim

NAI-A YA METETTER MA?

Tamil Nadu indang Sivagangai district nungi adianu anati mobile phone nung games asaya mapang indoktsü melen, tenati solar tashi ajanga aniba bicycle ka yanglutet. Adianu Veeraguruharikrishnan (12) aser Sampathkrishnan (11) nati yangluba solar bicycle ya kilometer 30 tashi aniteter. Sivagangai College Road tesem nungi Veerapathiran aser Ammani na jabosa ana rongnung tambusang, Veeraguruharikrishnan ya Thirupuvanam private school nung class 8 nung azünger aser tanubusang, Sampathkrishnan ya Sivagangai school nung class 7 nung azünger. Lockdown ajanga, school ajak shibanger aliba mapang ka nung, adianu ana yagi tena indang bicycle ka yimya balaka nung yanglutsü lemtet.

SUDOKU # 5924 TELANGZÜBA # 5923

| | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|
| | | | | | | | 7 | 8 | 9 | 4 | 6 | 1 | 3 | 5 | 2 |
| 8 | | | 2 | | | 5 | 1 | 6 | 4 | 5 | 2 | 3 | 9 | 8 | 7 |
| | | | | 6 | 2 | 4 | 2 | 5 | 3 | 9 | 7 | 8 | 6 | 1 | 4 |
| | 3 | 8 | | 7 | 1 | | 4 | 1 | 6 | 3 | 5 | 7 | 8 | 2 | 9 |
| 2 | 4 | | | 3 | 9 | | 9 | 7 | 8 | 2 | 1 | 6 | 5 | 4 | 3 |
| | | 7 | 4 | | 5 | 2 | 3 | 2 | 5 | 8 | 9 | 4 | 1 | 7 | 6 |
| | 7 | 2 | 5 | | | | 6 | 9 | 7 | 1 | 8 | 2 | 4 | 3 | 5 |
| 6 | | | | 8 | | | 8 | 3 | 2 | 6 | 4 | 5 | 7 | 9 | 1 |
| | | | | | | | 5 | 4 | 1 | 7 | 3 | 9 | 2 | 6 | 8 |

OJANG LUTEP # 5469

| | | | | | | | | | | | | | | | |
|--------------|---|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|
| LEIMBA | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| IRAKNYA | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| ENNDOGL | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| UGNNI | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| ERNBJO | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| KSAA | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | | | | | | | | |
| MMDANEEBILGI | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| IYAAKNB | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| MRAAENP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| AAATYI | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |

OJANG LUTEP TELANGZÜBA # 5468

**JEPNÜA LIA MALOKTSÜ AMA TIMTEM KA
 MADAK TIMTEM TIA AJURUSHI**

TAN HOPTA ATEMA - KOMA SÜLA ?

Q. Akhi tsüraburtemi yim akümdang yatetba ali kimong aser alushi dak alaka, tanü putu tasenba nung kibong kati ajangzük tetba ali rongsentem madakbo, kibur küma senmangtsü asoshi, tetsür - tebur aser jala- jabaso ta mali, kibong nung tsürabur ana mulung sūdaksü nunga koma süla ?

Maharashtra nung anentsüh lendong nung nisung 36 süogo



July 23, 2021 nü Maharashtra nung Raigad district kübok Talai yim anasa anentsüh lendong atalokba tesem noksa nung angur. Iba lendong nung nisung 36 asü aser tasü mang 32 bo nguogo

New Delhi/Mumbai, Chiteni/ July 23 (Agencies): Maharashtra state kübok Raigad district nung tzunglu maneni aruba sülen anentsüh lendong nung nisung 36 süogo aser nisung 1,000 dak tema kümzüko.

Tensa asadanga sülen osangbenertem den jembidang Maharashtra Chief Minister, Uddhav Thackeray-i, lendong ataloktsüsa aliba tesemtem nungi nisung aienshidaktsüsi aser tejenokdak agütsüsi atema pai tuyuogo, ta metetdaksü.

Chief Minister-i, "Raigad kübok Talai yimdak anentsüh lendong ajanga nisung 36 shi süogo. Tang tesem aika nung kümzüka maparen inyakdar. Anentsüh alutsüsa aliba

tesemtem nungi nisungtem ainshidaktsüsi aser tejenokdak agütsüsi ni tuyuogo," ta metetdaksü.

Thackeray-i, "NDRF den rescue teams-i Chiplun nung tzi metsünga aliba tesemtemi mouteter, kechiyong lenmang aser apudem raksaogo. Tensa mejungi lir," ta metetdaksü.

District administration-i ashiba agi, district nung anentsüh lendong ataloktsüsa aliba yim 110 shi lir, aser iba nungjagi yim 20 bo kanga majung.

Police-i ashiba agi, tesüiba ghonda 24 tashi tzunglu maneni aruba ajanga Raigad kübok tesem pezü nung anentsüh lendong atalokogo, aser gari lenmang aika mokdangogo.

Ketdangsertemi nüburtem

dang, tzi metsüng lendong nungi kümzüksü atema helicopter nungi angutsüsa kilem kolaki tur teyari atatsüla, ta metetdaksü.

Ano külen Union Home Minister, Amit Shah-i, pai Chief Minister Thackeray dangi call süa tensa metetpelaogo aser Centre sorkari akokba tashi state yaritsü ta shiogo, ta metetdaksü.

Amit Shah-i, "Maharashtra kübok Raigad nung lendong atalokba ya tzunglu sashia aruba aser anentsüh aluba ajanga lir. Ni CM Uddhav Thackeray aser NDRF DG, SN Pradhan na den jemiogo. NDRF teams-i teyari agütsüba den külemi kümzüka maparen inyakdar. Centre-i akokba tashi yaridar," ta metetdaksü.

Covid tanabuba wave mapang linük 52-i India yariogo: Centre

New Delhi, July 23 (Agencies): India nung coronavirus wara tanaben prokba mapang nung linük 52-i India yariogo, ta Centre sorkari metetdaksü.

Rajya Sabha senden nung MP, Binoy Viswam-i asungdanga langzüdang Minister of State (External Affairs), V.A. Muraleedharan-i, India nung wara tanaben prokba mapang nung linük aikati asen linük nung manguba mozü balala aser osettsüset balala agütsüsi melungteta liasü, ta metetdaksü.

Tanü tashi nung linük 52-i bendanglen yangluba osettsüset aika India nem agütsüogo; item rongnung sorkari sorkar nem agütsüba, nijai sorkar nem agütsüba, nijai nija nem agütsüba aser India nung

associations aser company balalai agütsüba densema lir, ta Union Minister-isa metetdaksü.

"Tenla arubatemji Inter-Ministerial Committee-i agizüka liasü; iba committee nung züngsemtemji Ministry of Health, MEA, Niti Aayog, DPIIT, MHA aser Ministry of Health & Family Welfare nungi ketdangsertem lir," ta Minister-i metetdaksü.

Minister-isa, "India nung wara tanaben prokba mapang nung bendang linük 52 nungi oxygen cylinders 27,116, oxygen concentrators 29,327 48, Oxygen PSA plants aser ventilators 19,375 nguogo," ta metetdaksü.

Bendang linüktem nungisa Favipiravir mozü 33,30,187, Remdesiver mozü 11,06,940

asertocilizumab mozü 5,10,245 den rapid diagnostic kit 19,88,985 nguogo.

Taküm February ita nung India nung coronavirus wara azüokteter liasü, ajisüaka iba wara tanaben prokba mapang nung linük kanga timtemogo.

Wara tanaben prokdang linük tesem ajungalen hospital tem nung shirangertem yipten agi mata, medical supplies agi kanga anünga liasü aser oxygen peria maliba agi shirangertem aika süogo.

Iba ama tensa ka nung sorkari alima linüktem dang oxygen supply agüjang ta teyari meshi. Indian Air Force transport tayimtsütem aser Indian Navy rongtem bendang linüktemi yoka medical supplies jenti bener aruogo.



July 23, 2021 nü New Delhi nung Indian Youth Congress züngsemtemi BJP lenir aser Minister of State, Meenakshi Lekhi'er kima la anema longkak aitba noksa nung angur.

OFFICE OF THE WATSÜ TELEN YAONGYIMSEN

P.O. CHANGTONGYA - 798613, B.P.O. YAONGYIMSEN

PELABA LEMSATEPER

Taküm kaketshirtem shisaliok pushiba nung **Sp. YANGERTEMJEN** S/o Late Limaonen aser Wt. Puryangla, pai HSLC tatidang nung Top 4 jenjang ajangzüktet aser ano **Kr. IMLINARO** D/o Wb. Aosanen aser Wt. Takonungla lai Environmental Education nung State Subject Topper jenjang ngutet, anungji nena dang iba konang tulu bener arutsüba asoshi asen Watsü Telen Yaongyimsen ajanga pelaba lemsateper.

Aser ano yimer kaketshirtem kwikati takok tulu nguogo, nenok ajak dang kanga sa pelar. Tarutsü nunga nenok ajak Tsüngrem-i moajangma ta asen Watsü Telen Yaongyimsen sarasadem.

Sd/- **I. SASHILA** President
Sd/- **MOANUNGLA** Secretary
Watsü Telen Yaongyimsen Watsü Telen Yaongyimsen



Office of the

Longsa Senso Tetsür Telongjem

KONANG TETUSHI AGÜTSÜR



Longsa lanur tetemjen kaketshir **Sp. Limatongzük Longkumer**, S/o. Wb. Jongpongtemshi Longkumer aser Wt. Toshirena Jamirtsür, NBSE kübok HSLC (2020-2021), tatidang nung Top 11 nguteta Longsa nübür nem tenüngsang bener arutsüba tepela Longsa Senso Tetsür Telongjem (LSTT) sabang ajanga Tsüngrem tenüng sanga takok angur nem tenüngsang agütsür.

Iba den külemi HSLC aser HSSLC kaketshir shirnokisa tatidang ajangtetogo, LSTT sabang ajanga ajak

nem tenüngsang agütsür. Tarutsü nenok wadang nung maneni Tsüngremi moajangma.

Sd/- **Wt. Tiakala** President

Sd/- **Wt. Toshiyangla R** Secretary



OFFICE OF THE

LONGSA KAKETSHIR TELONGJEM

TENÜNGSANG AGÜTSÜR

Wb. Jongpongtemshi Lkr aser Wt. Toshirena Jamir, tena jabaso **Sp. Limatongzük Lkr**-i 2021 HSLC tatidang nung top 11 jenjang ngutetba den, Wb. Toshimanen Tatar aser Wt. Tiarenla, tena jala **Kr. Imti Jungla**-i 2021 HSSLC (Arts) tatidang nung Philosophy subject topper nguteta LKT nem konang naroküm tulu bener arutsüba asoshi pelaba lemsateper.

Iba den külemi Imzüluba GHS Longsa, ano LKT züngsem shirnokisa taküm HSLC aser HSSLC tatidang nung takok tajung nguogo, nenok ajak nem LKT-i tenüngsang agütsür.

Sd/- **Temsüzülu Jamir** President

Sd/- **Nungsangtemshi** General Secretary



OFFICE OF THE

AO SENDEN

H.Q: MOKOKCHUNG: NAGALAND

Ph: 0369-2228896/ e-mail: aosenden@gmail.com

Date: 23/07/2021

ASÜKU LEMSATEPER

Taoba Ao Senden aser Naga Hoho President Tebu Teti Wb. I. Bendangmangyang Jamir 23rd July 2021 anepdang asüba osang angashia Ao sendeni kanga sasasetamang ayimer aser asür kibong aser kinunger den asüku lemsateper. Pa asüba ajanga asen Ao Kin asoshi kechaia melentsü makokba longzük tajung ka mekai akümer. Ao kin aser Naga nung asoshi pai inyakteta yutsüba mapa tajungtem Ao Kin otsü nung kodanga maidoktsü. Tsüngremi asür kinunger nem alimai magütsütetba anisüngzük mulungjang agüjangma, aser asür nula anisüngzükdak yujangma.

(Chubawati Longchar) President

(Imtipokym) Secretary

OFFICE OF THE

YIRUMEDEM SELF HELP GROUP, MERANGKONG

The "Yirumedem Self Help Group, Merangkong" would like to inform that the raffle draw in aid of fund raise, which was supposed to be held on 1st August 2021 could not be conducted on the said date and is compelled to be postponed until further notice due to the current prevailing situation of Covid-19 pandemic. We deeply regret for this inconvenience and request everyone to bear with us for the welfare and betterment of all of us.

(IMSUTIBA) President, YSHG, Merangkong Village

NÜ MAPANG ARUDANG COVID-19 MOZÜ AGIANG

MOZÜ AGIBA AJANGA
KÜMZÜKA AYUR.

MOZÜ AGIBA AJANGA TASHIDAK
TAJEMBA KÜMDAKTSÜR ASER
TASÜBA NUNGI KÜMZÜKER.

MOZÜ AGIBA AJANGA TASHIDAK
WARA ANENBA NUNG YARIR.



MOZÜ AGIBA AJANGA
ASEN KINUNGER ASER
MEDEMERTEM KÜMZÜKER.

MOZÜ AGIBA AJANGA AKHI
TENZA DANGI MEYIPBA
NUNG YARITSÜ.

TAOBA MAPANG COVID-19
AGI MENEPBA AJANGA
JUNJUNGA KUMZÜKA MALIR,
MOZÜ AGIANG

AJAK
MEKÜM TASHI
-ZÜK

SHINGA
KÜMZÜKA
MALI



SHIBA MOZÜ YA AGITSÜLA?

- Arishi küm 18 nungi tema aser danga tashidak alirtem densema.
- Mama yongdaksüba tanur tetsütem.
- Mashisa aliba tetsütem.

TETI ITEM TEKÜMDANGTSÜTEM BENSHIANG



Mask Agiang



Teka Metsükang



Tangar den Pila liang



Kidang Mongang

NAGALAND AGAINST COVID-19

Covid-19 aser temang timtem atema tasingdangtsü lira
Dial State Help line No.1800-345-0019 / National Toll Free - 1075.
Nenok meyong item den ASHAs, AWWs,
ya tongtepratepang : Anasatiba Mozü kitem

Democratic Republic of Congo anüdoklen civilian 16 tepset

Beni, Chiteni/July 23
(Agencies): Democratic Republic of the Congo (DRC) anüdoklen civilian tem shishilempadak nungi meyipa shilangba mapang lendong agütsürtemi mita atar amakba lendong nung nisung 16 asü, ta osang ajanga ashi.

Iba lendong ya North Kivu province kübok Beni yimti nungi kilometer 40 shi pilar Maimoya aser Chani-chani jila tsüngta highway nung Brehostibar nikongdang atalok.

Oicha jila nung aliba mozüki tekolakba, Jerome Munyambethe-i osangbener dang ashiba agi, asürtem rongnung tetsür trok aser tanur ka dena lir aser parnok ajak ya khaset.

"Mozüki tasümay ayudak nisung tasümay 16 lir. Kasa lendong nung yirur nisung tuko mozüki nung anepalur," ta Nicolas Kikuku-i ashi.

Allied Democratic Forces (ADF) teloki Oicha region nung aiben lendong agütsür. Ali rongsen peria aliba DRC anüdoklen ADF kübok telungpur telok 122 shi lir aser parnok 1996 nungi 2003 tsüngta rara tesashi ana rara liasü.

"Iba lendong ya ADF telok mapa lir. Parnoki rocket ka dena khaloktsü," ta Oicha nung alir Lewis Saliboko-i ashi.

"ADF tsükchirtemi yimjung meimba nübur dak maneni

makogo," ta Kikuku-i ashi. ADF ya mezüng Uganda anüolen poktet aser 1990s tiyonglen DRC anüdoklen amenok, saka parnok iba lendong agütsüba asoshi tenüng agia mali.

ADF ajanga 2013 nungi civilian 6,000 jungnüa tepsetogo, aser 2019 sülen tali akum, ta DRC nung aliba Catholic Church ajanga ashi.

2017 nungi Beni area kisüng nung nisung 1,200 dak tema asüba atema United States nung amenoker DRC anüdoklen azüdokshi asadangba telok, Kivu Security Tracker (KST) ajanga ADF tenüng asener.

March 10 nü US ajanga ADF ya bendanger kiralongrar lokti tentet ka, ta nungja agütsü aser par lenir Musa Baluku ya ISIL (ISIS) den tesendaktep lir, ta ashir.

Ajisüaka mongintemi ADF aser ISIL tesendaktep mejangjateti lir.

Telungpur telok balala den raratsü mechi DRC Tir Felix Tshisekedi-i North Kivu aser anasa aliba Ituri province nung May ita rara sangdonga liasü.

Iba mera agiba sülen civilian ketdangsurtem melena mitkar lenirtem shimok.

Ajisüaka mera tassenba yagi azüdokshi mazüoktet, ta Saliboko-i ashi.

"Nisung tepsetba manener alinung rara sangdongtsü nungdak mali. Operation mali, sepai talila mali," ta pai ashi.

Ecuador tepuokdak rongrong adok; nisung 22 asü

Latacunga, Chiteni/July 23
(Agencies): Ecuador nung tepuokdak tesem tulutiba nung rongrong adoka yangji alir nisung 22 tepset aser police aika yiru, koba taküm tepuokdak azüdokshi lendong tulu tanabuba ataloker alitsü.

Azüdokshiba azüoktsü atema southern Guayas province aser Cotopaxi province nung aliba tepuokdaki special police unit tem yoka liasü, ta sorkari Brehostibarnü ashi.

"Iba linük amokmerentsü merangba teloktem dang ni ya dang shiner, taoba sorkar ama tang aliba sorkar ya tashi mait ta bilema lira nenoki aibelener asütsü," ta Tir Guillermo Lasso-i Latacunga yimti nungi ashi.

Lasso, shiba May ita tir akum, pai linük nung aliba jail system nung state of emergency sangdongogo.

Police densema nisung 50 shi yiru.

Elite forces temi Bodhbarnü tepuokdak tesem ana tanaben azüoktet, ta SNAI prisons management body ajanga sangdong ka nung ashi.

Cotopaxi prison nung alir nisung 13 asü aser yangji alir nisung 35 den police tanishir nisung trok yiru, ta Brehostibarnü sangdong ka nung ashi.

Iba tesem nungi nisung 31 jena aotsü sentong liasü, koba police aser sepaitemi nokdangtet.

Guayas prison nung alir nisung ti asü aser police asem yiru, ta SNAI ajanga ashi.

Tepuokdak alir nisung 78 tanaben puogo, ta Interior Minister Alexandra Vela-i ashi.

February ita Guayas aser Cotopaxi densema tepuokdak tesem asem nung telok balala

tsüngta rara adoka yangji alir nisung 79 asü. Ecuador nung yimti tulutiba, Guayaquil nung Guayas ya lir.

Tepuokdak tesemtem nung rongrong adokba mapang nisung temang rangsa mi nung rongdokba ajanga tepuokdak alir telok balala indang tashi temai adoka sayur aser linük anakshitsü.

Ecuador indang prison system nung tepuokdak tesem 60 shi lir, kong nisung 29,000 ayutsü yanglu, saka yangji nütsüng onsara aser ketdangsur ajema lir.

Ecuador tepuokdak nisung 38,000 yua lir, kong tanüker 1,500 lir aser 2,500 shi agi anünga lir, ta mongintemi ashir.

2020 küm Ecuador tepuokdak nisung 103 tepsetogo, ta Ecuador indang human rights commission ajanga ashir.



China linük tiyonglen Henan province kübok Zhengzhou nung aliba mozüki ka nungi China nung mitkartemi shirangertem anizüker aoba noksa nung angur. Tzünglu kanga sashia arua tzümetsüng adokba ajanga Zhengzhou nung aliba mozüki ka metsüngbanga yangji alir nisung 3,000 shi taolen makai akum.

ATMA Chuchuyimlang Block-i sentong balala ayongzüka agi

Dimapur, Chiteni/July 23 (TYO) : Agriculture Technology Management Agency (ATMA), Mokochung, Chuchuyimlang block-i July 19 aser 20 nü Longkong aser Yaonyimti Old yimtsüing nung training, Demonstration aser Farm School Programme lapokba sentong ayongzüka agiogo.

Integrated Farming System (Crop-livestock-poultry-fishery model) dak sendakba nung Farm School ka July 19 nü Longkong yimdak Suteplenden Farm nung lapoktsüogo, aser alu kibur Imnatoshi, Achiever Farmer/Farm School tesayur asütsü shimogo. Farm school lapokba sentong tatsüka agiba mapang Chuchuyimlang block ATM Lipoktila-i, farm school lapokba nukjidong aser inyakyim tatsü agi metetdaksü.

Kasa mapang nung Ongpangkong South block ATM, Akangjungshi-i, Integrated farming system indang tajangzüktem lemsatep. Maneni sentong nung Farm School tesayur Imnatoshi-i, pa

Security Forces-i NSCN (KN) telungpur ka apu

Dimapur, Chiteni/July 23, 2021 (TYO): Bodhbarnü (21.07.2021) Security Forces den Police longjemer Meluri, Phek District nung NSCN (KN) telungpur ka apu, ta sangdong ajanga metetdaksü.

Osang tejangja ka nung ajemdaker, Security Forces den State Police longjemer team kati iba tesem mita aoba mapang ozüing alema rakzükraaktemba maparen nung dena alir NSCN (KN) telungpur ya apu aser pa ket nungi mobile phone ka ngutet.

Iba maparen dak sendakba nung bushisüingdangtsü atema, pua alisang aser pa ket nungi ngutetba oset Meluri Police Station, Phek District nung agütsüogo, ta kasa sangdong nung shia lir.

tajangshibatem aser fram indang otsü lemsatep. "Demonstration on Cultivation of Azolla" aser "Training on Mass multiplication of waste decomposer on Aqueous Media and its uses" onük nung ajemdaker farm school nung kaketshir 20 atema class ana agüja liasü.

Farm School nungsa Waste Decomposer solution aser salient features aser composting, drip irrigation, seed treatment aser disease management nung iba amshiyim dak sendakba nung ATM Lipoktila-i tangazükba agüja liasü. ATM, Chubaienla Jamir-i kaketshirtem dang Azolla amshiba metetdaksü aser Azolla metsütsü atema tangazükba agütsü. Kasaji July 20 nü Yaonyimti Old Village nunga Azolla metsütsü atema tangazükba agüja liasü. Iba

sentong nung nisung 10-i shilem agi.

July 19 nüsa Longkong yimtsüing nung "Integrated pest Management in Rice" onük nung ajemdaker training agüja liasü. Sentong nung shisalen agütsür Tuli block, ATM Shilunokdang-i, Stem borer, Rice leaf folder, Gundhi Bug, Rice Casewarm, Faw aser koya amala mo raksatsüba shiruru tem indang aluyimertem nem metetdaksü aser item shirurtem ya koda jangjatsü iba indang tangazükba agütsü. Paisa, aluyimertem nem lemtsüba IPM kits amshiyim sayuba den temeket nung aliba resource tem amshia jenjang dalang agi ITK balala koda yanglutsü, iba indang tangazükba agüja liasü.

Yimtsüing anaprongla nung aluyimertem nem Maize aser Maize shellers agüja liasü.

Office of the AO STUDENTS' UNION DIMAPUR

TENUNGSANG AGÜTSÜR

Ao Kaketshir Telungjem Dimapur ajanga HSLC & HSSLC tatidang, 2021 nung takok angur kaketshir ajak den tepela salem lemsateper.

Shishaliok nung takok angutsü atema kisüing masü saka chichiba senso ka kuma asüing asen lokti yangerba nübu kaka akumtsü asoshi meranga inyaksü onoki sarasademtsür. Aseni mawajemteti aliba wadang aser maongka ya meranga inyakba ajanga dang kokteter, aser yamaji nenoki maneni meranga inyaka tarutsü nunga takok angutsü sarasademtsür.

Takok anguba tepela salem.

Sd/-
TEMSUKABA AIER
TIR, AKTD

Sd/-
LANUWABANG JAMIR
TONGTIZÜLUR, AKTD

TENUNGSANG AGÜTSÜR

Wb. T. Simon Pongen aser Wt. Bendangsenla Jamir, (W/o. Mr. I Mosemsa Longkumer) na jala **Dr. TATONGKALA**-i "HORNBILL FESTIVAL IN CONTEXT: A STUDY ON THE CULTURAL POLITICS OF NAGA IDENTITY" nung thesis renema Department of Cultural Studies, Tezpur University, Assam nungi lai PhD ajangzüktemba atema Longjanglar Telongjem Dimapur-i nüma tanga la nem tetushi aser tenüngsang tulu agütsür.

Nai research agiba ajanga lokti asoshi shilem tulu agiba ajiteta onoki nü dang pelar aser tarutsü nunga nü maparen ajak tajungtiba nung inyaksü asoshi onoki sarasademtsür.

Iba dak alia Longjang Kaketshirtem, shirnokisa tawa agiba HSLC aser HSSLC tatidangtem nung takok nguogo, nenok ajak nem onoki tenüngsang agütsür aser tarutsü nunga nenok kaket shisatsü bushiba wadang nung maneni takok ngudakjang ta onoki sarasademtsür.

Sd/-
Mrs. T. Angangla Lcr
President,
Longjanglar Telongjem Dimapur

Sd/-
Mrs. Narojungla
Secretary,

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NOTIFICATION

NO. DTE/ ESTT-2/02/2020-21/ NSEE candidates who have submitted NSEE-2021 forms through Online are once again informed to immediately submit 3 (three) Nos. of latest passport size photograph to the office of Nagaland Board of School Education, Kohima on or before 27th July, 2021 without fail.

List of candidates who have failed to submit passport has been uploaded in the Department website: www.dtenagaland.org.in.

Failing to submit the same on time shall amount to rejection of form/candidature.

Sd/-
(Nungsangmenla Imchen)
Ex-Officio Director

OFFICE OF THE MERANGKONG SENSO TELONGJEM KOHIMA, NAGALAND

TENUNGSANG AGÜTSÜR



Wb. Temjenzulu Yaden aser Wt. Chubasenla Imsong na jala **Kr. Sentienla Yaden**-i HSLC tatidang 2021 nung top 11 jenjang ngutetba atema, Merangkong Senso Telongjem, Kohima-i la nem tenüngsang aser tetushi tulu agütsür.

Union-isa HSLC aser HSSLC tatidang 2021 nung takok angur kaketshir ajak nem tenüngsang agütsür aser tarutsü nunga nenok wadang nung takok lidakjang ta sarasademtsür.

Sd/-
Matsüing
President, MSTK.

Sd/-
Temjentoshi
General Secretary, MSTK



OFFICE OF THE CHANGTONGYA KAKETSHIR TELONGJEM PO- CHANGTONGYA-798613, DIST. MOKOKCHUNG

MANENI TENUNGSANG AGÜTSÜR



TEMSUTSUNGBA LONGKUMER

S/o. T. Onen Longkumer

HSLC Subject Topper: Social Science- 100 Marks
Fernwood School, Kohima

Tir Yimiyim adok VOL. XVVIII No.278, anogo CHITENI (JULY) 22,2021 nung Changtongya Kaketshir Telungjem (CKT) mendenti ajanga TENUNGSANG AGÜTSÜR ta sür HSLC nung Toppers aser Subject Toppers adoktsüba nung memeteti zükdokba maneni adoktsür. Nenok takok tajung ajanga sensosanger aser CKT nema tangteter. Tsüingremi asen kaketshirtem maneni moajangma.

Sd/-
TALITEMSU JAMIR
President, CKT

Sd/-
TIARENBA JAMIR
General Secretary, CKT

OFFICE OF THE CHANGTONGYA STUDENTS UNION KOHIMA

TENUNGSANG AGÜTSÜR



Longtila Jamir

D/o. N. Chuba Jamir

10th Rank 10, HSLC 2021
Subject Topper : Social Science
Model Higher Sec. School, Kohima



Temsutsungba Longkumer

S/o. T. Onen Longkumer

Subject Topper : Social
Science
Fern wood School, Kohima

Changtongya Students Union züingsem tajung shirnokisa HSLC aser HSSLC tatidang nung takok tajung ngutetogo asen students union ajanga tepelaba aser tetushi tulu agütsüba metetdaksür.

Tarutsü nung Tsüingremi nenok azüingba aser libaliro nung azükarutsütsü sarasademtsür.

Sd/-
Toshiwapang
President, CSUK

Sd/-
Lipokinla
Gen. Secy., CSUK

N.I JAMIR KINUNGERTEM DANG PELAR

Obala asür N.I Jamir kinungertemi mapang shia Primary Health Centre (PHC), Longsa nungdak reprangteta yaria arur. Ano tang-a par kinungertemisa Covid-19 tongpang rara nung amshitsü atema Rs. 50,000/- (rupees fifty thousand) tenla agütsüba asoshi kanga pelaba metetdaksür. Tsüingremi nübur dang teti meima arusang obala asür N.I Jamir dak jakzüker chirnur aser semchisemnurtem maneni moajang ta sarasademtsür.

Sd/-
M.O PHC, Longsa

Tokyo Olympics 2020 tenzükogo



Tokyo Olympics, Chiteni/July 23, 2021: Olympic Stadium nung 2020 Summer Olympics lapokba sentong agiba mapang, Mary Kom aser Manpreet Singh nati linük wako amer shilem agiba yangi noksa nung angur.

Tokyo, Chiteni/July 23, 2021 (Agencies): Küm ka shi thina arur sülen, Hokolbarnü (23.07.2021) National Stadium nung, terepranger ishika matsündang Tokyo Olympics lapokba sentong agiogo. Iba sentong nung adenertemi Covid-19 agi asürtem bilemteta, süngjema mokremer akhüm agüja liasü.

Japan Emperor Naruhito aser International Olympic Committee (IOC) President Thomas Bach naprongla mask inoker stadium telungi ait aser tenaprongla pilar amen. Naruhito, France Tir, Emmanuel Macron aser U.S. First Lady Jill Biden densema alima tesem balala nungi lenir 15 shi iba sentong nung denogo aser 1964 küm Naruhito tebo Hirohito-i inyakba ama, pai Tokyo Games 2020 lapoktsü.

Olympics lapokba sentong tenzükä telok balalai shilem agiba den sentsü balala adokba fireworks sayua liasü. Iba sülen, linük balala nungi teshimtet athlete den ketdangsür temi parade nung shilem agi aser International Olympic Committee (IOC) chief Thomas Bach aser Tokyo Organising Committee indang Chief Seiko Hashimoto nati o jembu.

Tena jembizüker sülen, Japan Emperor Naruhito-i iba

Games lapoktsü aser telok kari shilem agia liasü. Tennis asayar mongin Naomi Osaka-i Olympic Cauldron nung mi tsüklokja iba sentong tembang. Ketdangsür aser tongtibang nisung ishika matsündang, Olympics asayamung lapokba sentong ya agi.

Athlete tem parade agiba mapang, Indian contingent nungi Mary Kom aser Manpreet Singh nati linük wako amer shilem agiogo. Iba parade nung Greek team pur mezüng ait aser tatembuba telokji Japan contingent liasü.

Covid-19 dak sendakba nung tekümdangtsü mera agitsü atema bendanglen nungi tereprangertem taküm Olympics nung nokdang aser Olympic putiotsü nung iba tatalokba ya mezüng asütsü. Iba den bendenloksema, asaya tesem kar dak alaka, Japan nungi terepranger tem Olympics asaya shilem timbaka reprangtsü asoshi memelatsü renemogo.

Athlete, support staff aser media ajak Covid-19 protocol nung teti anidaktsüla aser anogoshia parnok Covid atema tendangtsü.

**** 1972 Olympics nung Israel team nungi asürtem bilemtet ****
Hokolbarnü, Tokyo

Olympics lapokba sentong agiba mapang, 1972 Munich Olympics asayamung nung Palestine nung 'Black September' teloki prangbong injang amshia kasetba Israel team züngsem tem bilemteta liasü. Sentong nung shilem agirtemi mapang tatsüka süngjema mokremer parnok nem aküm agütsüogo.

Israel team nungi züngsem 11 tashi iba lendong nung taküm sama aser mapang talangka nungi par adianutemi International Olympic Committee dang parnok (asürtem) nem akhüm agütsütsü asoshi mepishia aru, saka küm 49 sülen ang, Hokolbarnü Tokyo Olympics 2020 lapokba sentong nung asür kinungertem tebilemba ataloktsüogo.

Kasa mapang, iba Games nokdangtsü asoshi National stadium kima meketa lungkak aiter noklang aikati "Lives over Olympics" placard amer lungkak aitogo. Lungkak aiter temi mask inoker "Stop the Olympics" ta ayimtena jaja.

Iba Games August 8, 2021 tashi asayatsü. National Olympic committee 204 nungi athlete 11,000 densema refugee athlete indang team-i Olympic wako kübok saispung tetoktepba balala nung shilem agitsü sentong renemdar.

Striker Benzema dak Covid-19 putet

New Delhi, Chiteni/July 23, 2021 (Agencies): France aser Real Madrid team nungi striker, Karim Benzema dak coronavirus tashidak putet, ta Hokolbarnü Club sangdong ka ajanga metetdaktüsü.

Training tenzüktsü atema, Hokolbarnü Benzema Madrid-i arutsü imlaa liasü, saka pa dak Covid putetba ajanga iba wara nungi taneptsü mangu tashi pa Lyon, France nung amungtsü," ta sangdong ajanga metetdaktüsü.

Arishi küm 33 tain Benzema



anogo 10 tashi quarantine asütsü. June 28, 2021 nü European Championship asayamung nungi France tsükadokba sülen, Benzema-i

football asaya ka nung danga shilem agia mali.

August 14, 2021 nü, Madrid-i Alaves tesem nung iba season indang mezüng asaya nung shilem agitsü sentong lir.

France, shirnoki 2018 World Cup takok angu, Euro 2020 round of 16 nung Switzerland team-i parnok tsükdaktüsü. Iba asaya nung, Benzema-i goal ana idaktsü, saka France aser Switzerland na goal 3-3 draw nung tembang aser Switzerland-i penalty nung iba asaya koktet.

WI vs AUS: Tanabuba ODI asaya anogo atsülanger

Barbados, Chiteni/July 23, 2021 (Agencies): Australia aser West Indies na tsüngda ODI tanabuba asaya tenzüktsü minute ishika lia, West Indies team indang staff ka dak Covid-19 putetba sülen, iba ODI tanabuba asaya anogo atsülangtsüogo. Cricket West Indies ajanga nisungba tenüng memetdaktüsü.

Team ana tsüngda toss agir sülen, West Indies staff ka dak Covid-19 putetba osang tejangja sangoktsü. Iba sülen team anaprongla pei pei dressing room bushia moapu nungi tukadok.

Iba Tour mapang (taoba hopta tembangba T20 densema) team anaprongla pei pei tata hotel indang takdang balala nung anenzüka arudar, saka taoba hopta Saint Lucia nungi parnok ajak tayimtsü ka nung külemi Barbados tonga aru.

"Tendangba (Covid-19) maparen ajak tembanga osang jangjar sülen ang iba match tanaben asayashitsü atema anogo ka lemtettsü," ta West Indies Cricket sangdong ka ajanga metetdaktüsü.

"Covid-19 tetuyuba nung anidaktsü asoshi, West Indies team staff ka dak iba tashidak putetba osang angazükli dang, Kensington Oval nung toss agir sülen, ODI tanabuba athitsü asoshi telemtetba agi. Tanü (Hokolbar) team anaprongla nungi züngsem ajak aser ketdangsürtem anisüngzüka kazütsü. Covid-19 test osang tejangja meteter sülen, tanabuba ODI asayashitsü atema anogo ka lemtettsü. PCR-Test osang maru tashi parnok ajak pei pei hotel takdang nung shinga den majurutepi amungtsü," ta kasa sangdong nung shia lir.

Maneni, Cricket Australia (CA)-i ashiba agi, Honibarnü tasembuba ODI asayatsü asoshi arendaka bilemer. Iba asaya (tanabuba ODI) anogo atsülangba ya Australia nungi Riley Meredith atema takoksa asütsü. Pai iba asaya nung mezüng shilem agitsü renemer liasü. Series balala asayar arur külen nungi tan series bubble telungtet nung Covid putetba tensa ya Australia team puri mezüng ajangshir asütsü.

Deepika Kumari-i mezüng round nung Bhu Karma den asayatsü

Tokyo, Chiteni/July 23, 2021 (Agencies): Tetsür kija Archery tetoktepba mezüng round nung shilem agitsü asoshi, Hokolbarnü, Yumenoshima Park kübok tetsür kija qualification (ranking) round asaya nung, India tsür archer Deepika Kumari-i jenjang tukububa ajangzüktert.

Iba round nung world No.1 Deepika-i point 663 ngutet. Kasa qualification round nung arishi küm 20 tain Korea tsür An San-i point 680 shi tongteta lai temaba jenjang ajangzüktert. An San-i yanglutetba point (680) ya Olympic record asütsü.

Tetsür kija archery tetoktepba mezüng round nung Deepika-i Bhutan tsür Karma, shiba world No.193 nung lir, la den asayatsü. Qualifying round nung Karma-i jenjang 56buba tongtet. Quarter final (archery) nung Deepika-i San den asayatsü akok. 2019 küm, kasa tesem (Yumenoshima Park) nung Olympic Test asayamung mapang Deepika-i An San makok.

1996 küm Atlanta nung Olympics asayaba mapang, 'individual ranking round' nung otsüsüsüsä Ukraine tsür Lina Gerasymenko-i point 673 ngua

liasü. Taküm Korea tsür San-i iba record ajateta otsü tasen yangluogo.

World no. 3 Korea tsür Kang Chae Wong, shibai qualification round nung point 675 yanglua Korea tsür asem rongnung tasembuba round tongtet, alima nung otsüsüsüsä lai taoba asayamung nung point 692 ajangzüktert.

Par asem rongnung, Jang Minhee-i point 677 yangluteta jenjang tanabuba nung tembang. "Iba round nung junga asayaba den külemi shot kar nung mejungi asaya ama bilemer. Ni kechiba yamaji asayar memetet. Tajungba asayatsü tebilemba nung, shots tem aziüoka asaya liasü," ta Deepika-i ashi.

Tetsür kija archery asayamung nung, Deepika atema quarter final ya tayongzükba tuluka asütsü imlar. Iba round nung lai San den asayatsü akok. Taküm Olympics nung San-i mezüng shilem agir asütsü.

2019 'Tokyo 2020 Test Event' nung San-i Deepika tsükdaktüsü sülen küm ana lir, taküm asayamung quarter nung tena asayar, Deepika-i San nem maongka magütsüi asayatsü imlar.

BILEMDANGANG

"Alima melenshia aoba den külemi nungdakjia talila nungdaka akümer."